



*Rabu 16 Desember 2020*

**Ogen: Masmur 4:9**



**Teneng Tendingku**



**S**alah sada si idarami jelma eme ketenengen. Guna si e maka erbage usaha-usaha si ilakoken manusia guna ndatken ras ngenanamisa. Lit deba lawes ku ingan si melungun, entah deleng, entah ku kerangen, ku ingan si lenga enterem ngianisa. Lit deban erbahan erbage latihan kula, senam, paksa teneg ras meditasi si mere ketengen rukur. Lit deba arus ngkeriken erbage pencarinna lawes ku negeri si deban gelah jumpa ketengen nggeluh. Adi erbage usaha enda pe la erdalan maka lit kedungenna ia minem pil penenang gelah banci ia tunduh. Sebab salah sada ulih la kita teneng eme mesera matanta tertunduh. Janah adi matanta la tertunduh enda sada baban nggeluh si seh kal beratna ija kedungenna banci kita seh ku depresi. Si enda erkiteken rukur me kita lalap padahal arusna kita enggo istirahat.

Ibas renungenta enda ituriken maka man pemasmur ijenda, kai kin si erbahanca ia teneng? Nina ndai, 'Adi medem aku , entabeh pertunduhku, O TUHAN, kam saja ngenca si mereken ketengen si tuhu-tuhu man bangku. Adi si oge ayat sope renungenta enda maka ia labo kalak si musil. Enggo inanamina melala erta. Tapi sadar kal ia maka erta si melala ndai labo ulu ketenengen si tuhu-tuhu. Labo ngatakenca maka erta la perlu. Si perlu si idah maka pemasmur ngakuisa maka labo e ulu ketengen si tuhu-tuhu.

Ketengen si tuhu-tuhu eme sada penggejapen dame, aman ras ndauh i bas erbage kearun ate. Labo maka la lit perbeben kalak si ernalem man TUHAN tapi ibas perbeben siman alankenna e tek kal ia belinen TUHAN asa kai pe perbeben siman alankenna e, emaka teneng ia, entabeh matana tunduh. Bageme pengalamen Pemasmur ibas ndalani geluhna, kuga kita? Teneng denga nge kegeluhenta? Dikune lang kai nge sibahan nampatisa? Ertotolah, oge kataNa, andalken IA.